


Evri taem we yu serem wan toktok, wan foto o wan komen, i gud blong yu traem tingbaot gud fastaem, se wanem infomesen nao yu wantem ol narafala man oli save luk – mo wanem samting nao yu no wantem ol narafala pipol oli save kasem. Hemia i save givhan blong protektem ol praevet infomesen blong yu, blong mekem se ol narafala pipol oli no save aksesem mo go insaed long trak blong intanet blong yu, mo afta maet oli save mekem problem long yu o oli save winim sam samting aot long ol sikret infomesen blong yu.


## Olsem wanem nao bambae mi save serem ol samting wetem tingting?

Bifo yu serem samting long intanet, yu mas tingting gud se wanem samting stret nao bambae yu serem, o hu stret nao bambae yu serem samting wetem olgeta, mo hemia nao samfala kwesten we yu save askem long yu wan bakegen blong givhan long yu long saed ya:

1. Hu i save aksesem o lukluk ol infomesen ya – maet wan fren, wan famli, samfala studen, o samfala kolig?
2. Wanem infomesen nao yu luk se i stret blong yu serem wetem ol kaen pipol olsemia – bambae yu save serem nem blong yu, bondei blong yu, adres blong haos blong yu, o olgeta bilif mo tingting blong yu?
3. Wanem nao i save hapen sipos yu serem sam infomesen – maet bambae i save mekem wan narafala man i harem nogud? I posibol blong ol narafala man oli save karem wan defren tingting long wanem we yu stap tingting blong aplodem? Maet i posibol blong samting we yu serem i save spolem nem blong yu o nem blong wan narafala?



### Tingtingbak



*"Mi stap tingting gud mi wan fastaem, afta mi jes serem tingting i go"*

### Rispek



*"Mi stap mekem long ol narafala man i olsem we mi wantem oli mekem long mi"*

### Aksen



*"Mi stap folem ol sef mo stret fasin blong yusum intanet"*